

# Propostas de acción da CTNL

## para o período interassemblear 2020-2021

(para o seu debate na Asemblea Xeral Ordinaria do 7 de marzo de 2020)

### Accións para o cumprimento dos fins da asociación

---

#### 1 Defender os intereses xerais das/dos traballadoras/es de normalización lingüística e da dignidade das condicións de traballo dos servizos lingüísticos:

- Realizar propostas que busquen **mellorar a situación do traballo en normalización lingüística**, nomeadamente na procura da estabilización dos servizos de normalización lingüística e demais departamentos técnicos existentes, propor a creación e a mellora de axudas para o mantemento, a creación e o reforzo de servizos de normalización lingüística nas administracións locais e facer un seguimento das convocatorias xa publicadas.
- Continuar a **difundir o traballo que se desenvolve a prol do galego**, procurando así que o labor a favor da lingua se vexa socialmente como útil e necesario. Para isto continuarase a difusión e información a través do web e redes sociais do traballo de SNL, ENDL, asociacións, empresas, etc., publicando novas, reportaxes, entrevistas, etc. Tentarase divulgar especialmente o **labor de planificación lingüística** co fin de que se coñezan mellor as diferentes etapas do traballo técnico de normalización da lingua e de que se recoñeza a complexidade e a necesidade deste traballo. En relación con esta tarefa naceron o ano pasado os Premios Mil Primaveras, que teñen entre os seus obxectivos a difusión do traballo de normalización da lingua.
- Publicar e difundir o **Manual de procesos selectivos para técnicos/as de normalización lingüística**, co fin de ofrecer ás institucións unha guía para as súas convocatorias e ás/aos candidatas/os un manual que resolva as dúbidas máis habituais: prazos, contidos das bases, requisitos, reclamacións etc.

- Como complemento do manual anterior, finalizar unha **proposta de temario específico para prazas de técnico/a de normalización lingüística** que inclúa ademais **exemplos de probas, especialmente das probas prácticas**, adaptado todo á realidade do traballo de normalización da lingua. Buscarase despois que institucións que teñen capacidade para influír nas entidades que convocan as prazas recoñezan e asuman a proposta.

Con esta proposta búscase máis unificación nos procesos selectivos, evitar convocatorias pouco adaptadas á realidade do traballo de normalización da lingua e facilitar tanto a preparación das probas por parte dos/das candidatos/as coma o traballo dos membros dos tribunais de selección.

- Redactar unha **proposta unificada de probas de lingua galega para o acceso a prazas nas administracións públicas** (prazas diferentes a técnicos/as de normalización lingüística), a partir do traballado no [Curso sobre avaliación de competencias lingüísticas para técnicos/as de normalización lingüística, cuxo material xa está publicado no web](#). A proposta debería despois presentarse á Secretaría Xeral de Política Lingüística, á Dirección Xeral de Administración Local, á Fegamp..., é dicir, ás institucións que poidan asumila e recomendala como orientación para desenvolver este tipo de probas de capacitación lingüística.

## **2 Promover a formación continua no eido da normalización da lingua:**

### **ORGANIZACIÓN DE ACCIÓNS FORMATIVAS PARA O TRABALLO EN NORMALIZACIÓN LINGÜÍSTICA**

Cada ano a CTNL organiza directamente algunha actividade formativa sobre diferentes materias na procura de mellorar os coñecementos e capacidades das persoas que traballan en normalización lingüística en diferentes ámbitos.

Debido a unha serie de factores, como poden ser a falta de expectativas laborais, a cada vez maior formación do persoal técnico que está traballando e a non incorporación de novo persoal e tamén as maiores dificultades detectadas para asistir a formación en

horario laboral, cómpre reformular algunhas cuestións sobre o modelo de formación e facer esta dun xeito máis indirecto a través de materiais de diferente tipo ou de xornadas de formatos diversos, e non tanto a través de cursos nos formatos convencionais.

Deste xeito, propomos en 2020 o desenvolvemento dalgún curso ou obradoiro con algún dos seguintes contidos:

<b>Obradoiro de comunicación para a normalización lingüística (redes sociais, notas de prensa)</b>	
<b>Obxectivos</b>	<ul style="list-style-type: none"> <li>• Coñecer e analizar diferentes formatos e medios para comunicar as accións de normalización lingüística</li> <li>• Planificar axeitadamente a comunicación para accións de normalización lingüística.</li> <li>• Coñecer os formatos e aprender a redactar notas de prensa que comuniquen axeitadamente a mensaxe e información que se quere transmitir desde SNL, ENDL, asociacións en defensa da lingua, etc.</li> <li>• Coñecer como, cando, a onde e a quen se deben enviar as notas de prensa sobre lingua na procura de que teñan a repercusión axeitada no ámbito de interese.</li> <li>• Aprender a atopar titulares e frases que fagan que a comunicación chegue de forma máis eficaz</li> <li>• Coñecer as mellores técnicas de comunicación en redes sociais (estratexias, formatos que mellor comunican, etc.) para optimizar a presenza nas redes sociais dos SNL, ENDL e outras entidades que traballan en lingua</li> <li>• Conseguir que o traballo en lingua e as accións a prol do galego teñan maior e mellor repercusión social a través dos medios.</li> </ul>
<b>Destinatarios/as</b>	<ul style="list-style-type: none"> <li>• Traballadores/as de servizos de normalización lingüística (SNL).</li> <li>• Traballadores/as de empresas, asociacións e outras entidades relacionadas coa normalización da lingua.</li> <li>• Membros de equipos de normalización e dinamización da lingua do ensino.</li> </ul>



	<ul style="list-style-type: none"><li>• Persoas interesadas en traballar pola normalización da lingua.</li></ul>
<b>Duración</b>	Aproximadamente 8 horas presenciais e 4 horas non presenciais de traballo con titorización
<b>Profesorado</b>	Xornalista con coñecementos e experiencia, nomeadamente no ámbito da lingua.

### Obradoiro de comunicación de argumentos no ámbito empresarial

<b>Obxectivos</b>	<ul style="list-style-type: none"><li>• Analizar diferentes argumentos para asociar a lingua con intereses e vantaxes no ámbito comercial e empresarial</li><li>• Coñecer as estratexias de comunicación máis valoradas no ámbito empresarial</li><li>• Elaborar un argumentario que axude a introducir a lingua a canda outras vantaxes de comunicación no ámbito comercial e empresarial</li><li>• Desenvolver estratexias de comunicación orientadas ao sector comercial e empresarial</li></ul>
<b>Destinatarios/as</b>	<ul style="list-style-type: none"><li>• Traballadores/as de servizos de normalización lingüística (SNL).</li><li>• Traballadores/as de empresas, asociacións e outras entidades relacionadas coa normalización da lingua.</li><li>• Persoas interesadas en traballar pola normalización da lingua.</li></ul>
<b>Duración</b>	Aproximadamente 10-12 horas
<b>Profesorado</b>	Persoa con perfil adecuado para desenvolver o obradoiro.

<b>As ferramentas da educación social ao servizo da normalización da lingua</b>	
<b>Obxectivo xeral</b>	<ul style="list-style-type: none"> <li>• Coñecer as bases teóricas e as metodoloxías de intervención vinculadas á educación social para empregalas no proceso de normalización lingüística.</li> </ul>
<b>Obxectivos específicos</b>	<ul style="list-style-type: none"> <li>• Achegar unha visión panorámica e resumida das teorías que basean a intervención sociocultural e das diferentes abordaxes posibles, de maneira que sexa útil para o traballo técnico no ámbito da normalización da lingua.</li> <li>• Fornecer unha bibliografía básica recomendable.</li> <li>• Expoñer de xeito práctico diferentes modelos de intervención e o seu posible rendemento para a planificación lingüística e o traballo dos servizos de normalización da lingua.</li> <li>• Practicar, arredor de supostos concretos, as diferentes técnicas e habilidades que, desde a educación social, resultan útiles para a intervención sociolingüística.</li> <li>• Analizar algunhas intervencións realizadas para extraer conclusións a respecto das boas practicas que mellorarían a súa eficacia.</li> </ul>
<b>Destinatarios/as</b>	<ul style="list-style-type: none"> <li>• Traballadores/as de servizos de normalización lingüística (SNL).</li> <li>• Traballadores/as de empresas, asociacións e outras entidades relacionadas coa normalización da lingua.</li> <li>• Membros de equipos de normalización e dinamización da lingua do ensino.</li> <li>• Persoas interesadas en traballar pola normalización da lingua.</li> </ul>
<b>Duración</b>	Segundo o programa que elabore a(s) persoa(s) especialista(s) que o vaia(n) impartir.
<b>Profesorado</b>	Alguén con perfil adecuado do Colexio de Educadores e Educadoras de Galicia ou da Facultade de Ciencias da Educación onde se imparte o Grao de Educación Social.

## DOCUMENTOS FORMATIVOS E INFORMATIVOS

- Publicación dixital do **Manual de procesos selectivos para técnicos/as de normalización lingüística**.
- Publicación dunha proposta de temario para prazas de TNL
- Publicación dunha proposta sobre as probas para acreditar o coñecemento de lingua no acceso a prazas nas administracións públicas
- Procura de continuidade da colección de materiais **Documentos CTNL**, na cal se inclúen materiais formativos e de referencia.
- Publicación e difusión a través da rede de materiais formativos de cursos da CTNL.

## 3 Propostas para facer máis efectivo o traballo a prol da normalización da lingua e colaboración en accións para o fomento do galego:

### ACCÍONS PARA UNHA MELLOR E MAIOR IMPLICACIÓN DAS ADMINISTRACÍONS PÚBLICAS NO PROCESO DE NORMALIZACIÓN LINGÜÍSTICA

- **XUNTA DE GALICIA:** facer un seguimento da política lingüística da Xunta de Galicia, instándoa a que procure avances en vez de retrocesos, denunciando os pasos atrás que se dean e os pasos adiante que se deixen de dar e propondo melloras no desenvolvemento de proxectos e accións para o fomento do uso e prestixio da lingua galega.

Dado que este é un ano de **eleccións ao Parlamento de Galicia**, contactar coas principais forzas políticas que se presentan ás eleccións e proporlles que inclúan nos seus programas electorais de cara ás eleccións autonómicas o desenvolvemento dunha **política lingüística transversal** que fomente o uso e prestixio do galego en todos os ámbitos, a través de **servizos de normalización lingüística (SNL) estables** con capacidade de intervención social, dotados de recursos humanos e económicos abondos, co obxectivo xeral de incrementar o uso e prestixio da lingua galega en todos os ámbitos sociais, con funcións

claramente dinamizadoras, formativas e de asesoramento e que traballen de xeito coordinado con outras entidades con obxectivos normalizadores.

- **ADMINISTRACIÓN LOCAL:** facer un seguimento das convocatorias de axudas das deputacións provinciais para a creación de SNL e tamén das convocatorias de prazas en concellos e entidades locais ao abeiro ou non destas axudas; manter xuntanzas cos responsables das áreas de normalización lingüística das deputacións provinciais para que promovan a creación e consolidación dunha rede de SNL nas entidades locais da provincia.

## ENCUNTROS, XORNADAS E OUTRAS PROPOSTAS DE COORDINACIÓN

LGx15 ( <a href="https://lgx15.gal/">https://lgx15.gal/</a> )	
<b>Descrición xeral</b>	Organización dunha xornada de exposición de ideas que teñan que ver co futuro da lingua, na que interveñan persoas que transmitan, dun xeito breve e visual, ideas que poden, e queren, influír no futuro do uso e prestixio do galego e/ou nas actitudes e comportamentos lingüísticos de persoas ou entidades, procurando accións e cambios. Esas intervencións, ideas e propostas serán tamén gravadas e difundidas en vídeo a través da rede, nun formato semellante ao das conferencias TED.
<b>Obxectivos</b>	<ul style="list-style-type: none"> <li>• Recoller e difundir ideas coas cales se pode mellorar o futuro do uso e prestixio da lingua.</li> <li>• Realizar e difundir vídeos breves para a transmisión desas ideas.</li> <li>• Procurar influír no futuro do uso e prestixio do galego e/ou nas actitudes e comportamentos lingüísticos de persoas ou entidades, procurando accións e cambios, a través da transmisión de ideas e mensaxes de persoas.</li> </ul>
<b>Destinatarios/as</b>	<ul style="list-style-type: none"> <li>• Persoas interesadas no futuro da lingua (na sesión presencial) e, ademais, tamén público máis xeral (coa difusión dos vídeos).</li> </ul>
<b>Duración</b>	Unha tarde ou tarde-noite (arredor de 3 ou 4 horas).

<b>Formato</b>	Intervencións individuais cun tempo máximo (15 min.), claras e visuais, sen preguntas, e sen uso de mesa nin atril.
<b>Lugar</b>	Nun auditorio por determinar. Intentar manter un día da semana que permita maior asistencia de público.
<b>Persoas que interveñen</b>	Persoas que teñan algo que dicir, ideas que valla a pena compartir e transmitir para influír no futuro da lingua, e que teñan capacidade para comunicar de xeito claro, positivo, apaixonado, visual e breve, coa vontade de intentar mudar cousas. A busca ou selección de persoas e propostas faraa a CTNL.
<b>Notas sobre a xestión</b>	Desde a CTNL nomearase unha comisión encargada da organización, selección de persoas, xestión, etc.  Non se pagará polas intervencións.  Cobrarase unha entrada para asistir ao evento que axude parcialmente a financiar, en parte, o equipo técnico necesario, as gravacións, a difusión etc.

- **ENCUNTROS PARA A NORMALIZACIÓN LINGÜÍSTICA:** colaboración cos XXII Encuentros para a normalización lingüística, organizados desde o CDSG do Consello da Cultura Galega (en abril de 2020).

## ACCIÓN DE FOMENTO DO GALEGO

- **Desenvolvemento e resolución da segunda edición dos Premios Mil Primaveras a proxectos de posta en valor e fomento do galego (<https://milprimaveras.gal/>)**

Tras a primeira convocatoria destes premios en 2019 (convocatoria en abril, resolución dos premios en xuño e acto de entrega en setembro), continuarase con este proxecto, que xa foi convocado na súa segunda edición. Adiantouse a convocatoria neste ano 2020 de acordo coas suxestións das persoas que presentaron proxectos na edición anterior, que salientaron que o prazo de 2019 coincidiu con maior carga de traballo nos SNL e centros educativos. Co adianto tamén se procurará que tanto a resolución coma o acto de entrega poidan realizarse antes do verán.





Solicitarase de novo axuda á Deputación Provincial de Pontevedra a través da súa liña de subvencións a asociacións para desenvolver acción de normalización lingüística. E, se o acto de entrega se volve celebrar en Pontevedra, tamén se procurará a colaboración do Concello. Intentarase aproveitar o programa PonteGal (<https://www.depo.gal/pontegal>) para contratar os/as presentadores e actuación musical do acto de entrega.

- **Continuidade e difusión de Agasallo.eu, propostas de regalos en galego** (<https://www.agasallo.eu>)

A finais de 2013 púxose en marcha a plataforma dixital Agasallo.eu, para compilar e difundir propostas de regalos en galego de todo tipo, para todos os gustos e idades, etc., co fin de dar a coñecer e difundir creacións que usan a lingua galega e incentivar que a xente teña en conta a lingua á hora de facer agasallos.

A plataforma tivo moi boa acollida inicial e, aínda que custou a implicación de empresas e entidades para participaren nela, pouco a pouco foi medrando o número de participantes e a cantidade e variedade de propostas que contén. Na actualidade a plataforma contén arredor de 1000 propostas de aproximadamente 125 empresas.

Durante o ano 2020 estudárase algunha modificación neste proxecto para **reforzar as súas redes sociais**, mesmo incluíndo algunha nova como Instagram, en detrimento do sitio web, que só é consultado como ponte para ir aos webs das empresas que elaboraran os produtos. Continuarase cos sorteos do material que hai en stock e de novo material que se poida solicitar ás empresas participantes.

## **Algunhas propostas organizativas para 2020-2021**

---

- Mantemento da cota dos/as socios/as como nos últimos anos, sen ningún incremento (a cota convencional é de 25 € ao ano e a de desempregados/as e estudantes de 15 € ao ano).
- Posta en marcha de **grupos de traballo** para o desenvolvemento dos diversos proxectos programados.



- Procura de renovación de convenios e novos acordos de colaboración con outras entidades para o desenvolvemento dalgunhas das accións que está previsto desenvolver.
- Nas comisións e plataformas das que a CTNL forma parte seguiranse facendo propostas en positivo e procurando que sexan o máis plurais e representativas posible, e que a través delas se dea voz, participación e protagonismo a persoas e entidades varias e de distinto ámbito e perfil a prol da normalización lingüística. Nestes momentos a CTNL forma parte de:
  - Comisións Técnica do Centro de Documentación Sociolingüística de Galicia (CDSG).
  - Consello Municipal da Lingua do Concello de Vigo (froito da fusión entre o Consello Social da Lingua e a Comisión Cidadá de Normalización Lingüística, da cal formaba parte a CTNL)
  - Plataforma Queremos Galego.

Anxos Sobriño Pérez, presidenta da CTNL

Santiago de Compostela, 26 de febreiro de 2020